

义学序

从来世家右族礼义之化绍自诗书而诗书之流必有善培其源亦犹水之为物其源清者其流亦清独慨夫乡俗之披靡其不能显达无论矣即家庭骨肉间强欺弱众暴寡卑踰尊疏踰戚甚至有不堪言状其故何哉盖不能善培诗书之源也吾祖父联芹公笃志诗书当时咸以大器期之而仅以茂才终诗书之报不尽获于其身思欲遗于孙子于是积寸累铢建立学馆自斐贤公以下孙子始入学者延师课读其中送读家于先生菜资俸米外无所费盖置田三万许取租以供束修然犹虑其薄也其外房之就学者另自出金则为师计为族计又甚周今先人已往常以不获见为憾第修其业承其志数十年于兹矣其读书辈虽未能掇高登科仕版而厕芹宫者代有其人将有成者不少即耕鑿之俦罔不识字礼义之化亦几近之畴不胜饮水思源之意乎若曾伯祖长翰公有田若干石为继配生时养膳歿后入义学以补不足庶乎可矣后有好义者扩而充之合族

姓子弟成就陶成则又幸甚近乡邻有力之家多踵而行之是先祖培诗书之源又不仅一家一族已也今房下诸公恐久而忘所自命为予为序以永其传

时

皇清光绪八年岁次壬午季冬月吉旦

孙萃均敬书